



## SAOPĆENJE ZA JAVNOST

### **Ubistvo iz koristoljublja Aladinu Biseru 19 godina zatvora**

([link](#))

Tužilaštvo Brčko distrikta BiH dokazalo je optužbe protiv Aladina Bisera (38)\*, optuženog za ubistvo starije osobe počinjeno u Jagodnjaku kod Brčkog, u maju prošle godine. Po optužnici koja ga tereti da je udarcima tvrdim predmetom u predjelu glave, ramena i ruku, iz koristoljublja ubio obrtnika Fethiju Mihmića, optuženi je pred Osnovnim sudom Distrikta nepravosnažno osuđen na 19 godina zatvora.

Podsjetimo, optuženom je stavljeno na teret da je s ciljem da zadrži prevarno pribavljen novac od žrtve, kako bi izbjegao da ga vrati, planirao, pripremio, a zatim i počinio ubistvo Mihmića. On je optužen da je 31. maja prošle godine, oko 07,30 časova, vozilom odveo Mihmića u naselje Jagodnjak, a zatim ga na makadamskom putu, koji to naselje povezuje s Donjom Skakavom, izveo i poveo u šumu Gložđa, gdje mu je udarcima štilom za sjekiru u predjelu glave, desnog ramena i lijeve šake nanio povrede usljed kojih je nastupila smrt žrtve. Kako se navodi u optužnici, ubistvu iz koristoljublja prethodilo je dugogodišnje poznanstvo optuženog i žrtve, pri čemu je optuženi u posljednje tri godine, lažno se predstavljajući kao geometar, konstantno uzimao novac od Mihmića da bi mu navodno osigurao kupovinu nekretnine od distrikta Brčko. U namjeri da sebi pribavi protivpravnu imovinsku korist, lažno mu je prikazivao da može osigurati potrebne dozvole i putem geometra ubrzati postupak, ali da mu mora davati novac za navodne takse, postupke licitacije i geodetsku naknadu. Kako mu je Mihmić povjerovao, u više navrata mu je predao oko 80 000,00 KM, pri čemu ga je Biser radi plaćanja kontaktirao putem telefona, lažno se predstavljajući kao geometar Svetozar Vasiljević.

Nakon ubistva Biser je ubrzo otkriven i uhapšen, a 2. juna predat je Tužilaštvu Distrikta na daljnje postupanje tokom kojeg mu je odmah određen pritvor. Trajanje pritvora prema Biseru, na prijedlog Tužilaštva, produženo je i nakon podizanja optužnice 26. novembra prošle godine, kojom ga se tereti za krivično djelo Ubistvo, iz koristoljublja (*iz člana 163 stav 2 tačka 4) Krivičnog zakona Brčko distrikta BiH*). Kao i u najvećem broju ranije rasvijetljenih ubistava u Brčkom, počinilac je i u ovom slučaju brzo otkriven, a istraga protiv njega okončana je podizanjem optužnice za manje od šest mjeseci. Nakon glavnog pretresa, on je pred Osnovnim sudom Brčko distrikta BiH nepravosnažno osuđen na kaznu zatvora u trajanju od 19 godina. Jednako kao i Tužilaštvo, optuženi presudu može pobijati žalбом. O izjavljivanju žalbe, Tužilaštvo Brčko distrikta BiH odlučit će po prijemu pisanog otpravka prvostepene presude.

**Tužilaštvo Brčko distrikta Bosne i Hercegovine 5.9.2022. godine**

**GLAVNI TUŽILAC  
ZEKERIJA MUJKANović**

KRIVIČNO DJELO I  
ZAPRIJEĆENA KAZNA

# UBISTVO

*iz člana 163 stav (2) Krivičnog zakona Brčko distrikta BiH*

Kaznom zatvora najmanje deset godina ili kaznom dugotrajnog zatvora kaznit će se:

4) **ko drugoga liši života iz koristoljublja [...]**